



看大板

天年顛倒貶咧，該得係寒囉囉个天時，嘎滿哪都看得著著短袖衫个人。羽毛衫慍慍悴悴，罔在衫櫥个盡裡角，續落去，係毋係斯分人擲入垃圾車載走去？等啊等，在第一管春風吹過來進前，寒天總算出手又出腳咧！十度左右，唉哉，拗蠻冷哦！羽毛衫面皮打摺，笑咪咪分人搵出來放氣哩哟！著核蓬鬆个羽毛衫，一家屋人行對舊街路去，這一年一擺个「看大板」大事，當然落交毋得哦！

路線對起頭算起，單淨兩公里長忒等(nen')，毋過嘎跨過四個里七間廟，安做麼个路呢？往擺單純个寮下人無想恁多，正月半愛看大板，逐儕都知得愛仰脣行。今這下變做全國性个活動咧，四個里斯毋認輸哩哟！逐個都想出頭安路名，臨尾呀，乜毋知哪個人恁有學問，提出「文化街」這個名，里民無異議斯將恁泥定貼咧！

「新丁板節」這大活動，對正月半前一日鑼鼓轟天个踩街起勢，直直愛鬧到第二暗晡个擲炮城，到宮廟項擺核紅啾啾、一埕還過比一埕大、過重个新丁板，到切大板送親戚朋友、隔壁鄰舍分享為止，連續會鬧熱兩日。暗夜，寒都分人縮頸根哦，毋過看鬧熱个人還係同吊在半天高个紅燈籠比多，心情像大板上背个紅紙賞金共款，每一筆都係淦淦个歡喜同祝福。遺憾个係，紅燈籠下背一擔一擔生理人个電火珠光，將本來暗摸胥疏个路面，晟都像日時頭恁光，細人失撇擎燈籠个趣味，乜毋擎咧！這下嘎有遠夜市順續看大板該種各樣感覺。

其實，對東勢人來講「看大板」同擎燈籠，係一個擔竿个兩頭。還細時節，年一過，該吊在柑店項个紙燈籠啊，斯在冷風肚晃晃甩，寬寬同人攥手咧！色目靚款个紙燈籠，餵都人口涎水吞毋離。毋知頭天个偲較仰脣都愛嚙爺哀買佢一隻，因為「看大板」定著愛擎燈籠啊！這係東勢人對地雞屎恁大年紀，到擎估杖歲數共同个記憶。看大板係大人个頭路，迎燈籠做搞係細人个把變。暗摸叮咚个四圍，紅色个燈籠吊在半天高晃晃，路面大大細細隻个燈籠擎過來迎過去，蠟燭个光搖搖攥攥，燒燒暖暖，毋堵好又乜會看著火燒燈籠个生趣畫面。一條路無已長，親戚朋友嘎歸拖囉，三兩步腳爺哀斯會堵著熟事人，這搭一下該搭一下，細亞斯趁(tan')這機會在暗摸摸个所在，這晟該晟。在寒囉囉个天時，牽核世大人个手擎燈籠晟路，該燒暖个感覺，對大巴掌傳到細巴掌，傳入心肝肚。短短个路有淦淦个親情，長長个鄉親情誼，這係吾彩色个童年。

作者：劉玉蕉

☆詞彙學習☆

- | | |
|---|--|
| 【寒囉囉】hon' lo+ lo'：形容天氣很冷。「囉」本音 lo+，末尾小稱變調讀 lo'。 | 【歸拖囉】gui+ to+ lo'：一大堆。「囉」本音 lo+，小稱變調讀 lo'。 |
| 【盡裡角】cin' di+ gog'：最裡面。 | 【鑼鼓轟天】lo' gu' pang' tien+：鑼鼓喧闐。 |
| 【落交】lau' gau+：從眾多事務中丟失了。 | 【各樣】gog' rhong'：異樣。與平時不同的。 |
| 【寮下】liau' ha+：臺中市東勢區的舊地名。 | 【晃晃甩】gong' gong' hainn'：晃來晃去。 |
| 【定貼】tin' tiab'：塵埃落定。 | 【嚙】kiau'：撒嬌耍賴。 |
| 【搖搖攥攥】rheu' rheu' rhag' rhag'：搖曳不定。 | 【估杖】gu' chong'：拐杖。 |